

denberg<sup>10</sup> gehört vnd von dem var gen werdenberg<sup>10</sup>.  
Wer öch das die vorgeanten Grauen Hartmans kind<sup>3</sup>, erben  
amptlüt ald botten, mit Raisigen Lüten, koufflüten, ald mit anderen  
Lüten wer die wärint, ald mit kouffmanschaft gen / Bludentz  
in die stat, mit iro gelait kāmint, so hant si gewalt, alle die wile so  
das gelait bi inen ist, das sis belaiten sont war si went. Wer öch in  
die stat gen Bludentz komet mit gelait, ald ane gelait, an wedre  
herschaft der gelaites mütet, der sol vnd / mag in von dannen belaiten,  
als vor vmb gelait geschriben vnd beschaiden ist. Ich vorgeanter  
Graue albrecht von werdenberg<sup>2</sup> vnd min erben süllent  
och ainen weg han vnder der stat, ald ob der stat ze Bludentz:  
wederent wir wellint, den man / Riten vnd gan mug ane geuerde.  
Ez sol och der ysenberg, ze Biurs<sup>11</sup> mit allen rechten vnd züge-  
hörden, den vorgeanten Graue Hartmans kinden<sup>3</sup> vnd iro erben  
sin. So sol ich dikbenempter Graue albrecht<sup>2</sup> noch min erben,  
mit dem gejâgde in walgôwe nüt / ze schaffent han. Ez ist och  
berett, das ich obgenanter Graue albrecht<sup>2</sup> vnd min erben, ellü iar  
den vorgeanten Grauen Hartmans kinden<sup>3</sup>, vnd iren erben, von  
Gotzhüs lüten, ie ze sant Johans tage ze swnwenden geben süllint acht  
pfvnt vnd acht schillinge / vnd ietzo ze sant martis tag och acht pfvnt  
vnd acht schilling, alles Costenzer pfenninge Vnd welches iares die  
selben pfenninge, ze dewederm zil nit gerichtet wrdent als vorge-  
schriben stat so hant si ir erben vnd ir amptman gewalt, vmb das  
selbe gelt / mich vnd min erben vnd vnser amptman ze Bludentz,  
ze nôtend vnd zepfendent, in der stat ze Bludentz, in des ampt-  
mans hus, ald dauor, wo vnd wie si went, vntz das si gewert werden.  
Ez sont öch die vorgeanten Grauen Hartmans kind<sup>3</sup> ir erben  
/ noch iro amptlüt vber min vorgeanten Grauen albrecht<sup>2</sup>,  
noch miner erben lüt noch güt nit ze gebietend han, weder vber die  
Burger ze Bludentz noch vber . . Edel lüt noch vber Silberer,  
noch vber den hof vnd Hoflüt ze sant petern<sup>12</sup> noch vber die /  
ffrigen<sup>13</sup> noch vber die Gotzhus lüt, noch vber walliser, Ez  
were danne das ich vorgeanter Graf Albrecht<sup>2</sup> oder min erben  
hinnenhin lüt koufftent, die in Grauen Hartmans kind<sup>3</sup> oder iro  
erben gerichtten sässent oder wonent werind, die sont öch von, / iren  
gerichtten ze gerichtte gân, als ander Herren Lüte. Ich Obgenanter . .  
Graue albrecht von werdenberg<sup>2</sup> vnd min erben Vnd die  
obgenanten Grauen Hartmans kind<sup>3</sup> vnd iro erben süllent öch